



*Agar ayant conceu Ismaël, mesprise Saray qui la chasse ; est trouuée de l'Ange, & renuoyée : la Circoncision commandée.*

**A** PRES toutes ces choses, la promesse du Seigneur fut donnée à Abram en vision, disant; Ne crain point, ie suis ton protecteur & ton bouclier. Mais Abram se plaignant au Seigneur, qu'il demeuroit sans enfans, Dieu l'assura, luy faisant regarder le Ciel, que sa semence multiplieroit, & qu'en sa vieillesse il seroit enseuely en paix; l'assurant aussi, que sa race seroit apres grande seruitude deliurée des Egyptiens. Or Saray se voyant estre totalement sterile, donna Agar sa seruante à Abram, duquel elle conceut Ismaël, qui fut cause qu'elle mesprisa sa Dame Saray. Laquelle ayant remontré à Abram son mary, qu'elle ne pouuoit bonnement supporter le mespris qu'Agar faisoit de sa personne, ellé la chassa rudement hors de sa maison. Mais l'Ange dit à Agar, retourne, & t'humilie deuant Saray, & le Seigneur multipliera ta semence, en sorte qu'on ne la pourra nombrer. Puis le Seigneur s'apparut à Abram, qui se prosterna en terre; & Dieu luy dit, Mon alliance sera avec toy, & ton nom ne sera plus Abram, mais Abraham. Tu garderas donc mon pact, & seront tous masles d'entre vous circoncis, & circoncirez la chair de vostre prepuce, tant celuy qui est nay en ta maison, que le serui-teur acheté par argent. Ainsi fit Abraham le commandement du Seigneur.

*Genese 16. & 17. Chap.*